



Obraćanje visokog predstavnika na konferenciji za novinare

Dobar dan dame i gospodo,

Kao što znate, već 10 godina sam posvećen ovom regionu sa visokih diplomatskih funkcija. Prvo, kao ambasador Slovačke u Beogradu, zadužen i za Crnu Goru, Makedoniju i Albaniju, pa kao specijalni izaslanik Javieru Solane u Crnoj Gori za sprovođenje referenduma, i sad kao visoki predstavnik i specijalni predstavnik Evropske unije u Bosni i Hercegovini.

Prošlih sedmica krenula je vijest da se oslobađa mjesto ministra vanjskih poslova Slovačke. Ono što sam rekao tada vama u Sarajevu, bilo je preneseno i u Slovačkoj: da nisam na raspolaganju s obzirom na moj mandat u Bosni i Hercegovini.

Međutim, juče ujutro, na povratku iz Brisela, slovački premijer Robert Fico mi je saopštio da **mene** želi vidjeti na mjestu ministra vanjskih poslova. Tako jasan i direktan poziv nisam mogao odbiti.

Ipak, želim ovdje istaknuti da sam ponuđenu funkciju prihvatio jedino pod uslovom da moje imenovanje neće stvoriti probleme u Bosni i Hercegovini i da nema **vakuma** u vršenju funkcije visokog predstavnika. U tome me podržao i premijer Slovačke.

Tako, budite sigurni, **neće** biti vakuma na poziciji visokog predstavnika međunarodne zajednice u BiH. Kontinuitet Ureda visokog predstavnika neće biti narušen.

U ponedjeljak ću biti u Bratislavi kako bih i formalno prihvatio funkciju ministra vanjskih poslova i tako preuzeo jednu od ključnih pozicija u Slovačkoj.

Nakon toga, vraćam se u Bosnu i Hercegovinu dok se ne nađe rješenje koje će osigurati kontinuitet rada Ureda visokog predstavnika. Ovaj ured ostaje ovdje u svom punom kapacitetu do ispunjavanja prioriteta koje je zadalo Vijeće za implementaciju mira.

Jutros sam obavijestio ambasadore Vijeća za implementaciju mira, a nakon toga članove Predsjedništva BiH i Predsjedavajućeg Vijeća ministara BiH.

Neki će me optužiti da ovim korakom ostavljam Bosnu i Hercegovinu na cjedilu, a već sam vidio da se piše kako mi je dosta svega.

Ni jedno ni drugo nije istina. Jako sam privržen Bosni i Hercegovini i ostaću. Čitav svoj mandat sam radio sve da vam pomognem da ostvarite napredak na evropskom putu, da procesi koji vode punopravnom članstvu idu što brže, jer će **samo** tako zemlja biti stabilna i prosperitetna.

Posljednjih šest mjeseci sam uložio veliku energiju da bi se pažnja međunarodne zajednice ponovo vratila na Bosnu i Hercegovinu, u vremenima kada su mnogi drugi prioriteti na dnevnom redu. Vidjeli ste koliko jasnih poruka je Evropska unija poslala samo u posljednja dva dana najvišim zvaničnicima vaše zemlje.

Ali, ako vi sami, odnosno oni koje ste birali, ne želite sebi pomoći u tome, niko vam izvana taj nedostatak volje ne može nametnuti. Ovdje bih želio citirati visokog predstavnika za zajedničku vanjsku i sigurnosnu politiku Havijera Solanu koji je u razgovoru sa predsjednikom Radmanovićem rekao: „Mi smo spremni pomoći, ali prije toga **vi** sami sebi prvo morate pomoći“.

Vaši susjedi žele isto kao i vi, evropsku budućnost i bolji život. Njihovi lideri intenzivno rade kako bi i ove godine ostvarili konkretan napredak.

Još uvijek nije kasno da i Bosna i Hercegovina krene zajedno sa njima. No, za napredak je potreban dogovor i kompromis.

Dozvolite da kažem još jednu stvar: i nakon odlaska sa sadašnje dužnosti moj angažman prema Bosni i Hercegovini će se nastaviti. Bosna i Hercegovina će uvijek moći računati na to da ću kao ministar vanjskih poslova zemlje koja je članica EU i NATO, i s obzirom na moje iskustvo na Zapadnom Balkanu, činiti sve da procesi evroatlantskih integracija Bosne i Hercegovine idu u pravom smjeru.

Da ponovim još jednom, bez obzira na moje buduće imenovanje, kontinuitet rada Ureda visokog predstavnika i Specijalnog predstavnika Evropske unije će biti osiguran.

Hvala vam na pažnji.